

# «Nus lein divertir e buca vilentar»

Da gliendisdis tscheiver seprenta la Dertgira nauscha a Mustér

DA HANS HUONDER / ANR

■ Igl onn 1989 ha in vegl usit dil tscheiver a Mustér giu sia renaissance: La Dertgira nauscha. Dapi lu eis ella ina part integrala dallas activitads dil tscheiver ed il medem mument il punct culminont dalla sera dil gliendisdis tscheiver. Era uonn vegnan il stab da tscheiver ed ils treis derschaders a prender posiziun sin differents schabetgs digl onn vargau. Far tscheiver alla moda dalla Dertgira nauscha ei cumbinau cun satira, ironia e humor. E gestamein tenor quei principi ein la derschadra *Iris Casanova* ed ils dus derschaders *Fabian Huonder* e *Curdin Cajacob* era sepreparai uonn per lur sera, per lur seduta tribunala. Quella sepleiga el miez dil vitg da Mustér, gest sper la casa communal ch'ei meinsvart era tema dalla dertgira. Tenor usit vegn la dertgira accumpignada dil stab da tscheiver che consista d'ina partida dunnas ed umens, denter auter era dil Pren-ci tscheiver ed il narr che ha la fin finala la cuida da pender la delinquenta ni il delinquent. La Dertgira nauscha ei ina part dallas activitads dall'Uniuon da tscheiver Mustér. Ella ei denton autonoma. Dalla redacziun dalla Sibla vegn ella orientada cuort avon il tscheiver davart ils temas, per aschia impedir dublettas.

## Precauziun ei necessaria

Il stil humoristic dalla Dertgira nauscha astga ziplar ed era far rugadar ina ga ni l'autra el magun da vischinas e vischins. Tonaton ei la dertgira suandada ils davos onns la tenuta da vuler divertir e buca vilentar la gliעד. «Igl onn vargau havein nus giu differents reacziuns da persunas ch'ei stadas dil meini che nus sei-

gien memia migeivels», di Iris Casanova. Saver nua ch'il cunfin ei, ei buc adina sempel en tals cass e per quei motiv ei la dertgira pir che zacu dil meini che la recreaziun stoppi star el center. Fabian Huonder conceda lu era ch'ei ha dau avon enzacons onns reprimandas pervia d'ina u l'autra scena. Quellas han lu la fin finala menau alla tenuta che vegn vivida e praticada oz. «Per nus ei quella Dertgira nauscha era ina part dalla cultura dil tscheiver. Per quei motiv lein nus empruar da tgirar ella e da procurar per ina biala ed emperneivla sera», di Fabian Huonder ch'ei uonn per la tschunavla ga dalla partida sin la terrassa dalla Banca Raiffeisen. Tuts treis commembers dalla dertgira taxeschan sesez buc exnum per tips da tscheiver. «Per mei stuess ei buca dar tscheiver. Quella Dertgira nauscha ha denton adina fascinau mei, oravontut da buob», declara il Benjamin dil team, Curdin Cajacob. Las qualitads d'in commember dalla Dertgira nauscha circumscriva Fabian Huonder ch'ei bein enconuschents era per sias activitads sco collega da *Marco Schmed* tiels «Cantatores» suandontamein: «En sesez sto in tal haver humor, saver s'integrar ed esser simpatics. Naturalmein ch'il flair per l'ironia astga buca muncar.»

## Attents igl entir onn

Mintgamai l'entschatta schaner – pia rodund in meins avon il tscheiver – s'entaupan ils responsabels dalla Dertgira nauscha per discutir davart lur temas. Quels vegnan rimnai e nudai durent igl entir onn ora. «Pil pli strihein nus la mesadad, pertgei il temps da nosa presentaziun ei limitaus», di Fabian Huonder. En pliras sedutas vegnan ils temas allura circumscrets e preparai

aschia ch'els contonschan la fin finala era ina pointa. Medemamein vegn dau ad els ina successiun. Per ils auditurs eis ei interessant sch'igl entir decuors ha ina sistematica, pia sch'ina tematica meina praticamein vi en l'otra. Quei ei dil reminent reussiu fetg bein ils davos onns alla dertgira. Retschercas vegn ei fatg neginas per las tractandas: «Nus tedlein entuorn igl onn ora tgei che cuora e passa e quei tonscha per nus.» Il medem vala per ils schabetgs ord las vischnauncas vischinontas.

### Protocol a scret

Era uonn vegn a cumparer suenter la seduta dalla dertgira in protocol a scret en fuorma d'ina gasettina. Quella vegn dil reminent a cuntener ina novaziun. Biasas tematicas e schabetgs actuals che vengnan buca prelegi duront la seduta dalla dertgira vengnan publicai sin la davosa pagina en ina versiun concentrada. Tut en tut investescha mintga singul derschader rodund 50 uras ellas preparativas per quella sera da dertgira. La pagaglia persuenter obtegnan els dallas aspectaturas e dils aspectaturs. «Enzaco eis ei ina honur d'astgar esser en quella dertgira e da saver guder la preschientscha da bia giueud. Igl applaus per nossa lavur ei la fin finala la remuneraziun per nies engaschi», di Iris Casanova. «In sentiment tut special deriva era dalla vestgadira che nus purtein quella sera», cumpletescha Fabian Huonder. In auter aspect ch'animescha ils treis derschaders da s'engaschar ei la particularitad da quei eveniment: «Dertgira nauscha dat ei mo a Mustér e quei ei segiramein in usit che mereta da vengnir tgiraus.» La Dertgira nauscha ha dil reminent era creau ina homepage sut [www.dertgiranauscha.ch](http://www.dertgiranauscha.ch). Quella porchascha interessantas informaziuns.

## 200 onns negina Dertgira nauscha

Sco quei ch'ins sa leger el cudi-schet «Ils nums locals da Mustér» da pader *Ambros Widmer*, ei igl usit dalla Dertgira nauscha tschessaus entuorn igl onn 1780. En quella interessanta publicaziun constatescha igl autur: «Gnanc tgisà buc, lunsch ora il pli bi usit fuva quel dalla Dertgira nauscha che vegneva daus mintga dus, treis onns per gliendisdis tscheiver sut la participaziun digl entir pievel giuven buca mo da vitg, mobein era dils mats e dallas mattauns dils uclauns ed uclivas.» Ils giuvenils serimnavan, sevestgevan e serendevan lu en in til e da buna luna el coc dil vitg. Leu haveva la dertgira allura liug. Pader Ambros scriva: «Ed ussa entscheiva ina dertgira d'ina vivacitad e spirtusadad ch'ins sa ir ad encurir enzatgei aschi genuin ed actual, setracta ei gie buca mo da truar la terribla cureisma e da liberar e defender il legher Prenci tscheiver, mobein era da tinglar ed ironisar tut ils eveniments e schabetgs pli curios: politics e socials, capitai duront in onn ora.» Suenter la dertgira nauscha vegneva saltau e stau si da frestg entochen ch'il zenn grond dalla baselgia parochiala da S. Gions deva las dudisch. Ussa stueva il Prenci tscheiver svanir ord la tiara e far plaz alla cureisma.



**Els tres ein responsabels per las sentenzias e las objecziuns dalla Dertgira nauscha a Mustér: Curdin Cajacob, Fabian Huonder ed Iris Casanova (da sen.).**

FOTO H. HUONDER